



Oportunidadnan pa Arubianonan haci negoshi cu Cuba ta habri

Finalizando un bishita diplomatico na Cuba, Minister Otnar Oduber a reuni cu Sra. Ileana Núñez Mordoche, Vice Minister di Comercio Etranhero y Inversion. E mandatario di Aruba a ricibi un splicacion riba e plan di maneho di Cuba relaciona cu inversionnan internacional. Ta hopi importante pa sa den ki direccion specifico Cuba lo kier bay cu e posibilidadnan aki.

Cuba ta interesa primordialmente riba 11 sector specifico, pero tin 247 proyecto cu nan ta buscando inversion

internacional pa nan. Un di e interesnan specifico ta riba e negoshi di pintura, tambe fabrica di yena por ehempel di boternan, boternan di plastic, caha, etc. A enfatisa cu e tipo di inversionnan comercial cu Cuba ta desea ta actividadnan cu ta yega na produccion. Locual nan kier evita ta actividadnan comercial, por ehempel e patronchi di dren-ta Cuba y habri 10 tienda.

Nan ta mas interesa den e idea pa cumpra un pida terreno, trece mashin cu ta bay produci algo. Haya inversion ta halto riba nan agenda pa aumenta e fluho di capi-

tal pero kier mas enfoke riba produccion.

Si un negociante Arubiano kier establece su compania na Cuba esaki lo por den un zona specifico nobo cu yama "Zona Especial de Desarrollo Mariel" unda lo tin tambe incentivosnan special di impuesto pa e inversionistanan. Pero tin mas posibilidad pa negoshi na Cuba, por ehempel cerando un cooperativa cu un negoshi Cubano. Den un caso asina e compania Cubano lo tin derecho di 51 por ciento di e dividiendo y e otro partido 49 por ciento. Banda di esaki tin tambe e opcion den e sector di agri-

cultura. Tin den e zona comercial Mariel 465 kilometer cuadra di tereno disponibel especificamente pa desaroyo den agricultura.

Na final di e combersacion, cual tabata uno fructifero, a keda palabra di kier concretisa un plan pa facilita e comerciantenan di Aruba riba e nivel gubernamental, cu despues ta sigui riba e nivel comercial den e sector priva. Pa por logra esaki ta esencial pa tin un palabracion entre gobiernonan. Ambos partido a acorda riba un proposicion pa forma un grupo di trabou cu riba nivel gubernamen-

tal ta bay papia riba e plan di maneho nobo di Cuba y ta bay stipula puntonan specifico pa companianan di Aruba pa asina traspasa e informacion corecto pa e companianan priva y tambe na nos Camara di Comercio.

Awor ta sigui di biaha cu e pasonan pa cera e grupo di trabou aki cu lo ta consisti di representantenan di Gobierno di Aruba, entre otro di e Ministerio di Turismo, Transporte, Sector Primario y Cultura pa stimula y sigui facilita e proceso di inversion y posibel inversionnan di companianan di Aruba na Cuba. □